

JOHN 6, 51-58

Sa PCPII niadtong 1991 matinud-anong namalandong ang atong Simbahan ug nagsusi sa tinuod nga kahimtang sa iyang kinabuhi. May dan-ag ug kangitngit sa iyang hulagway nga mitumaw. Sa usang bahin kusog ang debosyon ug pagsaulog sa mga sakramento apan sa pikas bahin huyang ang 'evangelization'. Hinay ang pagpatuhop sa mga bili sa ebanghelyo sa kinabuhi sa mga tawo. Dalaygon ang kaisog sa simbahan sa pagdawat niini aron mahimong sukaranan sa pagpasiugdag kabag-ohan.

Naamgohan sa simbahan nga aron mabag-o siya kinahanglang iyang isaysay pag-usab sa kaugalingon ang sugilanon ni Jesus aron ang iyang pagsugilon niini ngadto sa uban mas katuohan. Importante ang pagbalik aron mahagit sa makuyaw nga paghandum ni Jesus. Unsa may gipasabut sa maong talagsaong pagpadayag?

Kapin na sa 2000 ka tuig sukad paglansang sa krus sa usa ka panday ug magsasangyaw didto sa Palestina. Ang paglansang niya sa krus dili talagsaon kay mao man nay nahitabo sa nangagi dihang mga 2000 ka rebelde gipanglansang sa krus. Apan ang talagsaon mao nga kining magsasangyaw nga panday nabanhaw! Ang mga tawo nagpangutana, "kinsa man diay kining tawhana nga nabanhaw gikan sa mga minatay?" Jesus ang ngalan sa maong panday nga gilansang sa krus. Unsa man diay ang iyang nahimo? Misuroy siya aron paghimog kaayohan. May daghang sugilanon giunsa niya pag-ayo ang mga buta, mga bungol ug mga bakul. Gipakaon niya ang gigutom ug naghimog bino gikan sa tubig alang sa kasal. Maluloy-on siya. Kon may tawo nga nanginahanglan, tubagon Niya ang ilang gipangayo. Naa bay peligro niining tanan? Klaro nga wala. Matud pa ni San Juan buot mamugos ang mga tawo nga himoon Siyang hari. Maoy gipasabot niana nga may kaayo silang nakita ug buot nilang magpabilin siya uban nila. May lain ba nga nakapahimo niyang 'peligroso'?

May mga magsusulat nga nag-ingon nga ang sinugdanan sa ilang pagkontra niya mao kadtong paglimbuwad niya sa mga lamesa sa tig-ilis og kwarta sa templo. Kadtoy sinugdanan sa iyang kinabuhing publiko. Natad na kadto sa ekonomiya ang iyang gisudlan. Busa peligroso. Kay naigo man ang adunahan sa ilang pagtampalas sa balay sa Dios ug paghimo niini nga taboan. Ang mga pariseo sa panahon ni Jesus inila sa birtud ug kaligdong apan giapil niya sila sa iyang pagsaway. Nakita niya ang ilang garbo ug tigpaka-aron ingnon nga balaan; nakita niyang strikto silang mosunod sa letra sa balaod apan way pagtagad sa tinuod nga diwa niini. Bisan ang

mga Skriba gisaway niya kay nagsul-ob silag tag-as nga bisti aron yukboan sa mga tawo ug buot silang molingkud sa atubangan sulod sa sinagoga ug sa tinahud nga lugar sa mga bangkete. Mao ni sila ang tigpakitag tag-as nga pag-ampo apan sila man diay maoy milamoy sa mga kabtangan sa mga biyuda. Ang gisaway ni Jesus mao ang kinaiya o 'attitude' sa mga pangulo nga mibangi sa mga bili nga ilang gitudlo. Nagpasabut kana nga wala nila 'ma-internalize' o mapatuhop sa kaugalingon ang ilang gipanudlo.

May mga tawo nga dili gusto sa kamatuoran ilabina kon kini mohagit sa ilang panglantaw o kinaiya. Ang kasagaran nilang reaksyon mao ang pagguba sa ebidensya sa kamatuoran o ang pagdaut sa nagsaksi niini. Ang politikanhon ug ekonomikanhong mga pangulo sa panahon ni Jesus kanunayng nagkabangi. Apan niining tungora nagkahiusa sila sa paglaraw sa iyang kamatayon, imbis maminaw sa iyang hagit aron mapatuhop sa kaugalingon ang mga bili nga ilang gitudlo ug mapasibo niini ang ilang kinaiya. Kining batasana nagpadayon karon diha sa mga tawo nga walay paghiusa kon 'integration' sa kaugalingon. Panagbangi ang anaa sa ilang kahiladman. Likayan nila ang kasakit sa kamatuoran pinaagi sa pagguba sa ebidensya niini ug likayan o dauton nila ang tawo nga nagpahinumdom nila sa katarong. Sa ilang paglikay sa kasakit nga angayng agian aron maangkon unta ang integrated ug hapsay nga kinabuhi, nagpaganoy hinuon sila ngadto sa mas sakit nga kinabuhi nga 'neurotic' ug puno sa bangi ug kontradiksyon.

Ang proseso sa pagpatuhop sa kaugalingon ug pagpuyo sa mga bili nga gituohan dili malalim ug murag makapakurat. Apan gikinahanglan gayud kining proseso sa panagtagbo tali sa atong kahiladman ug sa hulagway nga atong gipakita sa gawas. Dakong tentasyon nga ang maong panginahanglan atong ilimud sa ilawum ug atong tabonan sa gawas. Busa kon walay kaseguroan, ato ning hulipan pinaagi sa pagtigum og bahandi o pagpangitag gahum ug dungog. Kon dili ta makakaplag og bahandi, dungog ug gahum sa politikanhong kalibutan, ato ning pangitaon sa relihiyosong natad. Atong ipadayag ang kaugalingon diha sa mga tulumanon o mga ritwal nga tingali usa lang ka paglikay sa pagpauli sa mas lawum natong kaugalingon o sa mas lawum natong mga kahadlok. Ang mga pulong sa pag-ampo nga gikan sa kasingkasing tinuod nga pagdayeg ug paghimaya sa Dios. Apan anugon nga daghang mga pag-ampo nagpabiling mga pulong lamang. Makahimo ni pagtago sa kahadlok sa pagtidlum sa atong kahiladman. Makahatag kinig dili tinuod

nga hulagway nga maayo ta pagkahiluna uban sa Dios ug sa mga bili ug kinaiya nga gibarugan sa Dios.

Sa kapitolo 6 sa ebanghelyo ni San Juan klaro ang iyang gitudlo bahin sa Eukaristiya. Pagsaulog kini sa usa ka katilingban sulod sa 50 ka tuig isip pagkaon sa pasalamat aron paghandum ni Kristo. Gihagit ug gipaamgo ang katawhan nga misunod sila ni Kristo tungod kay nakakita sila sa mga milagro ug nakaambit sila sa kalan-on. Gihagit sila nga ang pagkaon simbolo sa mas dako nga gustong ihatag ni Jesus kanila. Ang susamang hitabo makita usab sa kapitolo 4 dihang nahinabi ni Jesus sa tabay ang babayeng Samaryanhon. Naghisgut si Jesus og buhing tubig apan ang babaye wala makaapas sa Iyang punto ug nangayo sa maong tubig aron di na siya magbalikbalik pa sa tabay. Dinhi sa kapitolo 6 naghisgut si Jesus bahin sa buhing pan. “Ako ang buhing pan nga nanaug gikan sa langit; bisan kinsa nga mokaon niining pan mabuhi sa kanunay.”

Ang punto ni Jesus mao nga sama nga ang pan mahimong bahin sa lawas ug makapabaskog niini, Siya usab ug ang Iyang mga pagtulon-an, mga bili ug kinaiya kinahanglan nga mapatuhop ug mahiusa sa atong kaugalingon aron mapuy-an ug aron kita mabuhi uban kaniya hangtud sa hangtud. Ang atong hagit dinhi mao ang pagpahigayon nga dunay pagkatakdo sa gawas ug sa sulod natong bahin. May mga tawo nga may debosyon ni Jesus sa tabernakulo ubag panglantaw nga gipriso si Jesus diha ug dili makahikap ni makahagit nato. Apan kon ang Eukaristiya dili sab nato masinati isip usa ka pagsaulog sa presensya sa buhing Jesus magpabilin tang way kabag-ohan. Gihatagan ta sa nabuhing Jesus niining pan isip simbolo sa Iyang kaugalingon. Ang pan iyang gikuha, gipanalanginan, gipikaspikas ug gihatag kanato. Kinahanglang magmaamgohon ta sa atong pagka-pinalanginan ug sa atong pagka-pinikaspikas aron ang Eukaristiya mahimong buhing pan alang nato. Kinahanglang matuhop ta sa kinaiya ni Jesus. Alang niini importante nato ang kahilum, ang hilum nga pag-ampo kon meditasyon. Mao ni makatabang nato sa pag-ila sa Dios ug sa pagtugot nga maganoy ta ngadto niya. May purohan nga di nato masabtan ang kahulogan sa Eukaristiya kon way kahilum ug di nato mapatuhop ug mapuy-an ang makuyaw nga paghandum ni Jesus nga maoy maka-patakus nato pag-uban kaniya hangtud sa hangtud. Amen.

+Emmanuel T. Cabajar, C.Ss.R. D.D.
Obispo sa Pagadian